



「大智度論」集粹之五十

論以凡夫若欲證道，聖者證實。聖者因菩提，願欲，嘗慧，過果。一四若畢竟空。……

論般若波羅蜜無作義

智銘

佛告須菩提：「菩薩摩訶薩欲行般若波羅蜜，不行色，是行般若波羅蜜；不行受、想、行、識，是行般若波羅蜜；乃至不行一切種智不行常無常，是行般若波羅蜜。不行色若苦若樂，是行般若波羅蜜；乃至不行一切種智若苦若樂，是行般若波羅蜜。乃至不行一切種智是我非我，是行般若波羅蜜。不行色淨不淨，是行般若波羅蜜；乃至不行一切種智淨不淨，是行般若波羅蜜。何以故？是色無所有性，云何有常、無常，苦、樂、我、無我，淨、不淨？受、想、行、識亦無所有性，云何有常、無常，乃至淨、不淨？乃至一切種智無所有性，云何有常、無常，乃至淨、不淨？復次，菩薩摩訶薩行般若波羅蜜時，不行色不具足，是行般若波羅蜜；不行受、想、行、識不具足，是行般若波羅蜜；乃至不行一切種智不具足，是行般若波羅蜜。何以故？色不具足者是不名色，如是亦不行，是行般若波羅蜜。受、想、行、識不具足者，是不名識，如是亦不行，是行般若波羅蜜；乃至不行一切種智不具足者，是不名一切種智，如是亦不行，是行般若波羅蜜。」

「若菩薩摩訶薩行般若波羅蜜時，不行色不礙，是行般若波羅蜜；不行受、想、行、識不礙，是行般若波羅蜜。不行眼不礙，是行般若波羅蜜，不行耳、鼻、舌、身不礙，是行般若波羅蜜；不行意不礙，是行般若波羅蜜。不行檀波羅蜜不礙，是行般若波羅蜜；……：不行般若波羅蜜不礙，是行般若波羅蜜。乃至不行一切種智不礙，是行般若波羅蜜。菩薩摩訶薩如是行般若波羅蜜時，知色是不礙，知受、想、行、識是不礙，乃至知一切種智是不礙；知須陀洹果不礙，……：知阿耨多羅三藐三菩提不礙。」

「是甚深法，若說亦不增不減，若不說亦不增不減。譬如佛盡形壽，若讚若毀，虛空讚時亦不增不減，毀時亦不增不減。諸法相如是，若說亦如本不異，若不說亦如本不異。」

若菩薩不行一切法，不得一切法，所謂若常若無常，乃至若淨若不淨，是名行般若波羅蜜。一切法者，從色乃至一切種智，是菩薩行法，是法中，無智人行諸法常等，智人行諸法無常等。是般若波羅蜜，亦諸法畢竟實相故，不說諸法常、無常。無常等雖能破常等顛倒，般若中不受是法，以能生著心故，思惟籌量，求常、無常相不可得實。

是故，若不行色等不具足，是行般若波羅蜜。色具足者，有人言：色等法中，常無常等憶想分別，是名具足。不具足者，是中用無常等觀破常等，是名不具足，少常等故。今於色中亦不行無常等，是故言不行色不具足，是爲行般若波羅蜜。復有人言：具足者，謂補處菩薩能如色實觀，乃至一切種智，是名具足；餘者是不具足。若菩薩不行色等不具足者，即是行具足般若波羅蜜。何以故？色不具足則非色，色非常相故。佛言：出衆生於常中，著無所有中，隨語言音聲故，是故說如是實清淨亦不行，是爲行般若波羅蜜。善說道、非道故，歎爲希有，礙者非道，無礙者是道。佛觀衆會心多迴向空，知般若波羅蜜無礙相，是故說不行色等無礙，是行般若波羅蜜。能如是行者，於色等法無礙。

衆生法是畢竟空，菩薩大精進力，不隨邪疑心故，雖未得佛道，未滅諸結，而能大勇猛，能如是行菩薩道爲衆生，但衆生亦空。譬如種種彩色，欲畫虛空，此中佛說衆生空因緣，所謂十方如恒河沙諸佛，以神通力，爲衆生無量劫說法，一一佛度無量阿僧祇衆生入涅槃，假令如是，於衆生無所減少。若實有衆生，實有減少者，諸佛應有滅衆生罪。若衆生實空，和合因緣有假名衆生故，無有定相，是故爾所佛度衆生，實無減少。若不度亦不增，是故諸佛無滅衆生咎？是故說：菩薩欲度衆生，爲欲度虛空。是故佛說：「虛空不可取故虛空清淨，虛空清淨故，般若波羅蜜清淨。」

一切法畢竟空，如幻、如夢，凡夫法、聖法皆是虛誑，小菩薩以凡夫法爲虛誑，聖法爲實。聖法因持戒、禪定、智慧，修集

功德所成，故以爲實。以凡夫法自然有，如響自然出，非是人故作以爲誑，衆生無始世來，著此身故，聲從身出以爲實；小菩薩深樂善法故以爲實。虛空中無音聲、語言相故無所說，是語言、音聲，皆是作法，虛空是無作法。般若波羅蜜亦如是，第一深義畢竟空，無有言說，一切語言道斷故。

如虛空無所得相，不得有，不得無。若有，無相如先破空相；若無，因是虛空造無量事，般若波羅蜜亦如是，有、無相不可得故清淨。

般若波羅蜜，因諸法正憶念故生，正憶念者，畢竟空清淨，故一切法不生不滅，不垢不淨。

須菩提白佛言：「諸菩薩摩訶薩般若波羅蜜，是摩訶般若波羅蜜，何以故？雖一切法自性空，而諸菩薩摩訶薩，因般若波羅蜜，得阿耨多羅三藐三菩提。亦無法可得轉法輪，亦無法可轉，亦無法可還。是摩訶般若波羅蜜中，亦無法可見。何以故？是法不可得，若轉若還，一切法畢竟不生故。何以故？是空相，不能轉不能還；無相相，不能轉不能還；無作相，不能轉不能還，若能如是說般若波羅蜜，教、照、開、示，分別、顯現、解釋、淺易，有能如是教者，是名清淨說般若波羅蜜。亦無說者，亦無受者，亦無證者。若無說、無受、無證，亦無滅者，是說法中亦無畢定福田。」

法輪即是般若波羅蜜，是般若波羅蜜，無起無作相，故無轉無還。如十二因緣中，說無明畢竟空，故不能實生諸行等。無明虛誑顛倒，無有實定，故無法可滅。

說世間生法，故名爲轉；說世間滅法，故名爲還。般若波羅蜜中無此二事，故說無轉無還。無法有法空故，無轉是有法空，無還是無法空。

有人說：諸法有四種相：一者、說有；二者、說無；三者、說亦有亦無；四者、說非有非無。是中邪憶念故，四種邪行，著

此四法故，名爲邪道。是中正憶念故，四種正行中不著故，名爲正道。是中破非有非無故，名無法有法空。佛說乃至破非有非無，故說無有轉，無有還。破非有非無有二種：一者、用上三句破；二者、用涅槃寶相破。般若波羅蜜中，無般若波羅蜜相，一切法無相故，乃至檀波羅蜜亦如是。內空乃至一切種智相空，亦如是。

諸佛雖說法，令他得道，破煩惱，從此至彼，名爲轉，今我等諸煩惱，虛誑顛倒，妄語無有定相，若無定相，爲何所斷？若無所斷，亦無轉、無還，是故說雖轉法輪亦無轉、還。何以故？是般若波羅蜜中，無有法五眼所能見。若轉？若還？一切法從本已來畢竟不生故。是自性空，畢竟空，非轉相，非還相。畏墮常故不轉，畏墮滅故不還；畏墮有故不轉，畏墮無故不還；畏墮世間故不轉，畏著涅槃故不還。如自性空、畢竟空、十八空等無量諸空；是空解脫門，不轉、不還；無相、無作亦如是。

入是三解脫門，捨我、我所心，是名說得解脫。能如是不取相，不著心說般若波羅蜜教，照等。說者若案文，若口傳。教者，爲人讚般若，令受持、讀誦、正憶念。照者，如人執燈照物，若人不知般若，以智慧明照之令知。開者，如寶藏閉門，雖有好物而不能得，若開其門，則隨意所取，如人疑不信般若者，開邪教扉，折無明關，是人則隨意所取，示者、如人眼視不明，指示好醜，如人有小信小智者，亦是道非道，是利是失等。分別者、分別諸法，是善是不善，是罪是福，是世間是涅槃。經書畧說，難解難信，能廣爲分別解說，令得信解。顯現者，佛爲種種衆生說種種法，或時毀訾善法，助不善法，趣令衆生得解。說法者，說佛意趣以應衆生，令知輕重相。解釋者、如囊中寶物，繫口則人不知，若爲人解經卷囊，解釋義理。

第一義中，實無所說，畢竟空故無說，無說故無受，無受故無證，無證故無滅諸煩惱者。若無滅諸煩惱，則無福田，無福田故無作。

虛雲和尚讚

慧光

巍峨衡嶽。佑民降師。鼓山受具。巖洞修持。東泰禮佛。五台北馳。孝感菩薩（文殊）。化身（文吉）相隨。寒侵瘡厲。左右療醫。觀燈螺頂。團團火飛。研經西華。雪窟透迤。碑林雁塔。領畧雄姿。峨帽香進。金頂宵輝。道場（迦葉）重建。橐鉢南陲。騰衝緣結。首獲鉅資。仰光繼進。檳嶼探奇。星洲跋涉。參遍神祇。臺員奧窗。鯤海漣漪。沙門橫禍。集議滄歸。御前告狀。清帝（光緒）鴻施。迎送龍藏。閱歷險夷。浪破溟渤。暹羅栖遲。謝恩陛下。酬酢紳耆。凱旋風雨。洱海龍嬉。贊敬臚餽。肯以飽私。涓滴存庫。有猷有爲。神州反正。康藏靖綏。屢謁元首。（孫中山袁世凱）聆證慈悲。說服疆吏（李根源唐繼堯）。奠安滇池。遄返初地。錢樹花莊。曹谿夢接。祖庭忘疲。夜壇傳戒。虎伏皈依。白狐得度。枯柏生枝。三公（林森居正蔣中正）護法。遐邇光垂。寇氛勇禦。賑災卹饑。赴難巴蜀。陪都日熙。雲門移錫。蜂兆前知。南無復旦。瑞應桃緋。嘉賓（美國詹寧士女史）蒞止。頓悟披緇。澤露羣庶。晉駐京畿。夙孚衆望。主鬯謙辭。睦隣（錫蘭）受寶。舉國延釐。蘇杭開示。南通箴規。石佛致敬。梵唄如儀。武漢禮懺。禪七再期。匡廬健躡。聖蹟靡遺。雲居蕪穢。亟赴勤治。墾荒築路。浮屠樹碑。鐘破復合。禎祥紀時。柔遠懷舊。安輯僧尼。春秋百廿。示寂低眉。五洲萬國。同誦阿彌。蓮座心印。竭誠摛詞。